



Cusseglier naziunal Martin Candinas (a dretga) cun Guido Ratti, dapi passa 40 onns speaker tar il vial da bob a San Murezzan.

«Mia carriera politica è in passlung»

Maraton engiadinais: Giasts prominents

DA GION NUTEGN STGIER / ANR

■ **L'ediziun da giubileum dal Maraton da l'Engiadina è er stada in inscunter da la politica naziunala e chantunala. Tranter ils giasts envidads eran per exempel Dominique de Buman, il president dal cussegl naziunal, e lura anc outra prominenz. Sche tge relaziun ha quella tar il passlung?** Sco adina ils davos bunamain tschintg decennis è il Maraton da skis engiadinais er quest onn stada ina sentupada cun il motto vesair ed esser vesì. La davosa fin d'emna è vegnì festivà il giubileum da 50 onns dal Maraton engiadinais e quai cun occurrenzas pli pitschnas e pli grondas. A pled èn vegnids anteriurs victurs dal maraton, anteriurs commembers dal comité d'organisaziun e lura er represchentants da la politica. In bel dumber da quellas persunas envidadas ha lura er persequità la dumengia la cursa da passlung a l'arrivada a S-chanf. Cun intgins da quels prominents avain nus discurti.

Ina fitg buna reclama

El haja mai fatg il Maraton engiadinais, ha ditg *Martin Aebli*, il president dal cussegl grond. Ina relaziun cun quel haja el gi entras ses bab. Quel saja stà blers onns schef da la mesiraziun dal temp e quai ils emprims onns dal maraton. Quel mument vegniva il temp anc mesirà a maun e ses bab era a l'entschatta a Maloja tar la partenza cun l'ura e da là gieva el cun l'auto a Zuoz a l'arrivada per lura mesirar il temp da mintga participant. Aebli menziuna ch'el haja adina gi dapli rela-

ziun tar il ski alpin ed er tar il hockey cun esser stà activ en omadus sports. Fin us anc mai sa participà al Maraton da l'Engiadina è er cusseglier naziunal *Martin Candinas*. «Eventualmain fiss quai tuttina anc interessant da far insicura il maraton cura che mes uffants èn pli gronds», punctuescha Candinas. El haja bain entschet a far passlung, ma cun avair famiglia lura terminà cun quel sport. Il Maraton engiadinais saja ina fitg buna reclama per il sport da naiv e per il Grischun. Da quella occurrenza tut che discorra ed er en ses circol d'enconuschents saja il maraton adina puspè in tema. «Sin quel event da sport dastgain nus Grischuns esser loschs», ha ditg il cusseglier naziunal da la pcd.

«Jau admir ils Engiadinais»

Giast tar l'ediziun da giubileum dal Maraton da l'Engiadina è er stà cusseglier guvernativ *Mario Cavigelli*. El ha ditg che ses sport preferì saja adina stà il ski alpin. Passlung n'haja el betg fatg savens ed il maraton insomma mai. L'occurrenza da la segunda dumengia da mars en l'Engiadina saja in event cun in effect sur ils cunfins grischuns, gea schizunt sur ils cunfins svizzers, ha menziunà il president da la regenza. El ha er ditg ch'el admira il Engiadinais, ils blers voluntaris che sajan l'entir enviern fatschentads cun organisaziuns da numerusas occurrenzas da sport sco polo, White Turf, ski alpin, snowboard, bob e skeleton. Sco il comité d'organisaziun dal maraton cun persunas cumpetentas hajan er las autras occurrenzas al timun persunas cun ina

gronda experientscha, ha menziunà Cavigelli.

«Sun losch d'esser qua»

Da buna luna è sa mussà *Dominique de Buman*, il president dal cussegl naziunal, a l'arrivada a S-chanf. El saja nagin passlungist, persuerter adina puspè fatg cursas da muntogna la stad. Tschintg giadas haja el schizunt fatg la cursa da muntogna Sierre-Zinal. Ina relaziun cun il passlung haja el bain cun esser stada sia carriera politica in vair «passlung da 32 onns», ha ditg il cusseglier naziunal cun in surrir. El saja fitg losch d'esser da la partida al Maraton da l'Engiadina ed insomma en il Grischun. Suentar sia eleziun sco president dal cussegl naziunal haja el mess intginas prioritads en l'agenda da terms e sco ina da quellas da visitar il Maraton da l'Engiadina, ha menziuna de Buman. In sport ch'el haja fitg a cor saja er il hockey e cun plaschair sa regorda el als temps ch'il duo russ, Bykov e Chomutov, haja giugà cun il Club da hockey Friburg.

Fatg 18 giadas il maraton

Er tranter la prominenz politica era a S-chanf *Anna Giacometti*, la presidenta communal da la vischnanca Bregaglia. Fatg il maraton haja ella mai, dentant admira ella mintga participant e participa che sajan da la partida. Grazia als blers success da *Dario Cologna* ils davos passa diesch onns saja il passlung vegnì anc pli popular, ha ditg la dunna da la Bregaglia. Ella gaja gist la stad fitg gudent a muntogna. «Caminare è il mio sport», ò detg Giacometti. *Dumeng Giovanoli*, l'anteriur skiunz internaziunal, el che ha il 1968 gudagnà ils slaloms da la Cuppa mundiala da skis a Wengen ed a Kitzbühel, er el avain nus entupà. 18 giadas haja el fatg il Maraton da l'Engiadina, ha ditg l'um da 77 onns. Gist 37 onns haja el fatg part dal comité d'organisaziun è stà saja quai in bel temp. Ses pensum saja cunzunt stà da guardar dal traject da la loipa da Maloja fin Segl. «Jau hai bellas regurdientschas sco commember dal comité d'organisaziun», punctuescha Giovanoli. L'occurrenza da sport da Maloja a S-chanf haja gronds meriti ch'il passlung saja oz fitg popular er en Svizra. Ultra da quai saja il Maraton engiadinais per la regiun da fitg gronda valur. Il traject da 42 km saja er fitg singular quai che pertutgia la varietad tipografica e gist perquai saja il Maraton engiadinais anc adina ina sfida per mintgign.



Fascinà da l'occurrenza da passlung è stà Dominique de Buman, il president dal cussegl naziunal.

FOTOS G. N. STGIER



S'entupads tar il Maraton engiadinais èn cusseglier guvernativ Mario Cavigelli (a dretga) ed il president da la vischnanca S-chanf Gian Fadri Largiadèr.



Ils dus anteriurs deputads da la pcd Hannes Parpan (a san.) e Ralf Kolleger.



Bler laud per il Maraton engiadinais er d'Anna Giacometti, la presidenta communal da la vischnanca Bregaglia.



Fatg 18 giadas il Maraton da l'Engiadina ha Dumeng Giovanoli, l'anteriur skiunz internaziunal.



Giast d'onur è er stà Martin Aebli, il president dal cussegl grond.